

Kalaallit Nunaanni arnanut kalaallinut naartunaveersaasersuisimanermut (spiralilersuisimanermut) piffissami 1960-1991-imi ilaasunut taarsiiffiginninnissamut aaqqiissummut isumaqatigiissut

Danmarkimi naalakkersuisut (Socialdemokratiet, Venstre aamma Moderaterne), Danmarksdemokraterne, Socialistisk Folkeparti, Liberal Alliance, Det Konservative Folkeparti, Enhedslisten, Radikale Venstre, Alternativet, Aki-Matilda Høegh-Dam (N), Aaja Chemnitz (IA), Anna Falkenberg (SP) aamma Sjúrður Skaale (JF).
akornanni taasinissamut isumaqatigiissut.

Naalakkersuisut saammaasseqatigiinnermut aningaasaateqarfimmik, inunnut ataasiakkaanut arnanut spiralilersuineramik suliami aamma kalaallinut allanut, kalaaliunertik pillugu ilaginnarneqarsimasunut aamma aaqqiissuusaanikkut assigiinngisitsineramik nalaataqarsimasunut aningaasanik taarsiiffiginninnaasumik pilersitsinissamik kissaateqarput.

Partiit isumaqatigiissuteqartut naartunaveersaasersuineramik suliaq (spiralilersuisimaneq, Danmarkip aamma Kalaallit Nunaata akornanni ataatsimut oqaluttuarisaanermi kapitali nuanninngitsuusoq isumaqarput. Kapitali taanna kalaallinut arnanut eqqugaasunut annertuumik kinguneqartitsisimavoq.

Spiralilersuineramik suliaq Kalaallit Nunaanni kalaallinut amerlasuunut aamma ilaqutariinnut amerlasuunut kamannermut aamma aliasunnermut pissutaasoq, partiit isumaqatigiissuteqartut ataqqivaat. Pissusissamisoortumillu Danmarkip aamma Naalagaaffeqatigiinnerup qanoq isigineqarneranut sunniuteqarpoq. Saammaasseqatigiinnermut aningaasaateqarfiup sinaakkutaasa iluanni, arnat taakku aningaasanik taarsiiffigineqarnissamut periarfissaqartinneqassasut, partiit isumaqatigiissuteqartut isumaqarput.

Taamaattumik partiit isumaqatigiissuteqartut taarsiiffiginninnissamut aaqqiissummik pilersitsinissamik kissaateqarput, kalaallinut arnanut Kalaallit Nunaanni piffissami 1960-1991-mi naartunaveersaasersuisarnermut ilaasimasunut, inunnut ataasiakkaanut taarsiiffiginninnissamut periarfissiisumik.

Aaqqiissuteqarneq malillugu taarsiiffigineqarnissamut qinnuteqarnermi piumasaqaatigineqassapput: 1) Arnaq Kalaallit Nunaanni piffissap 1960-1991 akornanni najugaqarsimassaaq, 2) arnap sapinngisamik eqqaamasaminik Kalaallit Nunaanni imaluunniit Danmarkimi kostskolernermini imaluunniit efterskolernermini akuerseqqaarani imaluunniit ilisimanngisaminik piffissami 1960-1991-mi naartunaveersaaserneqarsimanerminik nalunaaruteqassaaq, aamma 3) arnap pisimasoq uppersarsassavaa, ass. tutsuiginartumik nalunaaruteqarnermigut.

Partiit isumaqatigiissuteqartut aningaasat taarsiissutiginartussat 300.000 kr.-t arnamut ataatsimut isumaqatigiissutigaat, naartunaveersaat sorliunersoq apeqqutaatinnagu.

Taarsiiffigineqarnissamut qinnuteqaatit inatsisissatut siunnersuutip apríilimi 2026-mi saqqummiunneqarneranit 1. juni 2028-p tungaanut Patienterstatningenimut nassiunneqarsinnaassapput. Taarsiissuteqarnissamut aaqqiissut 1. juni 2026-mi atuutilissaaq, tamatuma kingorna taarsiiffigitinnissamut qinnuteqaatit suliarineqassapput.

Partiit isumaqatigiissuteqartut aammattaaq isumaqatigiissutigaa, arnat taarsiissuteqarnissamut aaqqiissummut ilaasinnaasunik ujartuilluni aamma siunnersuilluni suliaqartoqassasoq, arnat qinnuteqaateqarnissamut ikiorserneqarnissamik aamma katsorsarneqarnissamik ikiorserneqarnissamik pisariaqartitsisut ilanngullugit.

Partiit isumaqatigiissuteqartuttaaq isumaqatigiissutigaat, maanna eqqartuussivimmi suliamut ingerlasumut eqqartuutitsiniartunut immikkut ittumik ingerlatsisoqassasoq, arnat taakku taarsiiffigineqarnissamik qinnuteqassanngitsut, kisianni Ildenrigs- og Sundhedsministeriet arnamut ataatsimut taarsiiffigineqarsinnaasumut 300.000 kr.-nik isumaqatigiissuteqarnissamik neqerooruteqassasoq, taarsiiffigineqarnissamut aaqqiisummi piumasagaatit naapertorlugit.

Aaqqiisummut tunngaviusoq isumaqatigiisummut ilanngussatut ilanngunneqarpoq.

Isumaqatigiissut taasinissamut isumaqatigiissutaavoq, isumaqatigiissutip imarisaanut pilersitsinissamut, partiit isumaqatigiissuteqartut inatsisissatut siunnersuummut akuersiniarlutik isumaqatigiimmata.